

DANIERI

(Daniel – Daniel)

Danieriva vau entaraqaahairo 600 ihi aitarovaro Ihuva vataini qovarama vura.

Ho Danieriva vau entara Babironihainaava King Nebukanesaava nai iqoka vaiinti hampata ani iqoka raquqiro viharo Ieruharemiqi vauka naatara kero vika airitahaa rumpa varero Danieriravata nai navunaaka hampata rumpa varero Babironini vuru kora.

Danieriva vi vatanaaka kaiqa vareharo viva una variqa nutu tuahere vauka hampata vaiharo kia Kotira uva qaqlira karaitiro, kempukaiqaa kero Kotira uva iriqiro viharo kia muaravata autiraitiro, kia hampi kaiqavata vararaitiro, avuqavuqama kero kaiqa varaqiro vi vaura.

Maa vukuraqi Danierira uva Hini 1-6 vaivaro Hini 7-12 kia vairo.

Danierira nai navunaaka hampata rumpa vare Babironini vuru kora

1 ¹King Jehoiakimuva Iutaini vaukaqaa taaramo ihiara raqikiqiro vuvaro, viraqaahairo King Nebukanesaava Babironi vatukaqaa raqiki vauva nai iqoka vaiinti hampata Iutaa vatanaaka ntaihareva anintora. Vika Ieruharemi vatuka ututumate ekaa vatuka viraqi vu aararavata kuvaite vaura.

²Nebukanesaava vika ntaihareva anuvaro Noravano Kotiva vira qaqi kovaro viva iqoka raquqiro viharo Iutaqaa raqiki vaura King Jehoiakimura aatara kero, oru Kotira Naavuqi vato haikara, hini ku haikara varero vuru nai maaqaini nai una variqanavu naavuqi vatora.

³Mintimakero viva nai avuhainaara naavuqi kaiqa vaiintiqa raqiki vaura Asapenaasirara tiharo, Iutaa vaiinti autu vataukave, avuhainaa vaiinti vira ankuqiraukave, are vikaqihira qaraaka vaiinti vonavu ntita varera aniane. ⁴Vinavuka vaatavano kia qoraiqama kero vairaitiro, koqe viri vaata vatauka vaiha, vo kaiqa vo kaiqa ho taveka vaiha, qaraaka sikuru okaravata vaaka tavekama variate. Mintimake koqe avu aato vateka vika homa ti avuhainaara naavuqi kaiqa vare vaivar, are tinavu Babironi uvavata qara nti okararavata vika numiqenarave, tiro.

⁵ King Nebukanesaava minti tivakero qaiqaa tiharo, Tenavu nora vaiintivanu naaina kararave, *uainirave*, are vikavata nimiramanta namaqi vuate. Are vika tinavu okara taaramo ihiara numiqaqira viramanta viraqaahai vika ti kaiqa varaqi vuate, tiro.

⁶ Manti tuvaro Asapenaasiva oru qaraaka vaiinti vonavu ntita vatora. Viva Iutaa ankuqihairo Danierira vo, Hananiaara vo, Misaelira vo, Asaraiaara vo, vinavuka ntitero anura. ⁷ Asapenaasiva qaraaka autu vinavuka ntava nimiteharo,

Danierirara *Beltesasaarave*,
Hananiaarara *Sataraaakirave*,
Misaelirara *Misaakirave*,
Asaraiaarara *Abetnegorave*, tura.

⁸ Mintuvaro Danierira nai aatoqi irikero tiharo, Te kia Nebukanesaara karavata *uainivata* narerave. Vi karara Kotiva qioqama tai kararave, tivakero viva Asapenaasirara ti kahaqiraqe kia vi karara naare tuvaro ⁹ Kotiva Danierira kahaquvaro Asapenaasiva virara koqe vaiintive tivakeharo viva Danierira kahaqireva autiharo ¹⁰ Nebukanesaara autu qeteharo Danierirara tiharo, Avuhainaava niara ne vi kararave vi namarirave viraqaima naate tiva tairave. Are kia vi kararave vi namarirave namaqira viraitira, naantiara are vira avuqaa oru vairaro viva ai viri vaata tavairaro kia koqe irera, vira kaara viva ti haruma kaanarove, tura.

¹¹ Ho Asapenaasiva Danieriravata vira navunaaka taaramonavuvata raqikiarire tiro, vo vaiinti kaamatova vaunaini Danierira oruntero virara tiharo, ¹² Are kauqurutanta entama tinavu avatamakera tavareva, naaharavata qaqi namarivata tinavu timiraqe namaqi vuare.

¹³ Kauqurutanta enta aitarairara are tinavu viri vaatavata, Nebukanesaara kara neka viri vaatavata rairakera tavaane. Tavera, viraqaahaira are tinavuara ho vi karara namaqi vuate, kia vi karara namaqi vuate tiane, tiro.

¹⁴ Danierira minti tuvaro viva ho mintima ivarave tivakero kauqurutanta enta varakero ¹⁵ tavovaro vinavuka viri vaatavano koqe iro vaumanta Nebukanesaara kara ne vaukavata naatara kora.

¹⁶ Mintuvaro viraqaahairo vi vaiintiva qaqi komanta vinavuka Nebukanesaara kara kia naraiti, naahoqai namaqi vi vaura.

¹⁷ Kotiva qaraaka vaiinti 4navu kahaqumanta vinavuka kankomake vi vatanaaka *vukuqiraa* kaiqave, vo okara vo okarave, tavamaqi viha ho tavora. Kotiva Danierira kahaquvaro viva vo vaiinti vo vaiinti taira tavora vira okara tuqantaakero yutukero nái tiva nimi vau vaiintiva vaura.

¹⁸ Ho King Nebukanesaava taaramo ihi aitarairaqe vi vaiintika tavaare tu entava anintovaro Asapenaasiva qaraaka vaiinti vika ntita varero

Nebukanesaava vaunaini vuru kovaro ¹⁹ Nebukanesaava vika hampata uva tivaqiro viharo tavomanta Danieriva vo, Hananiaava vo, Misaeliva vo, Asaraiaava vo, vinavuka ekaa vo vaiintivata naatarake koqemake uva okara iri vauka vauvaro viva vinavukara tiharo, Nenavuvata homa ti avuhainaara naavuqi kaiqa varevarave, tura.

²⁰ Nebukanesaava vinavuka vo uva vo uva irama nimiteharo tavomanta vinavuka koqe uvaqai vira nai tiva ami vaura. Viva tavovaro vinavuka avu aatovano koqema vauvaro vira vure vaiintive, quaha vare vaukave, hepi kaiqa tavokave, vika avu aatovata naatara kora. Kia vi vataraqaa vinavuka avu aato aatarakaarirava vovano vaura.

²¹ Danieriva Nebukanesaara kaiqa airi ihiara varaqiro viviro, Pesia avuhainaava King Sairusiva Babironi naatarako ihiraqaa kia qaiqaavata vira kaiqa varora.

Nebukanesaava taira tavora

2 ¹Nebukanesaava taara ihiara Babironiqa raqiki vau entara viva taira vo tavora. Viva taira tavero, viraqaahairo airi avu aato utiharo kia ho vaitora.

²Kia ho vaitaraitiro, viva nai vure vaiintinavuve, quaha vare vaukave, hepi okara tavokave, opu makauqaa ampeqama keha naantia qovaraiqaina haikara tave vaukave, vika vika naarama kero nai taira okara tiva timiate tumanta vika aninte King Nebukanesaara avuqaa himpite vauvaro ³viva vikara tiharo, Te taira vo tave, viraqaahai airi avu aato utiha vaunarave. Ne vira okara ti tiva timiqe iriare, tiro.

⁴Minti tumanta opu makauqaa ampeqama keha tave vauka vika nái Araami uvaqihai tiha, Avuhainaao, are ekaa enta qaqi variqira vuane. Are taira tavaanara tinavu tiva timiraqe tenavu vira okara ai tiva amiare, ti.

⁵Vinavuka minti tuvaro Nebukanesaava aqao tiro, Te maa uvara kempukaiqamake niara turo: Te taira tavaunara viravata vira okaravata ne ti tiva timiqe iriare. Ne kia ho ti tiva timivera, te tiari ni vaata vira-qaahai aiqu kauqu rumiki raamikimake, ni naavu maaqavata ruku raakurama kaivaro kirikairima vuanarove. ⁶Te taira tavaunara viravata vira okaravata ne ho ti tiva timivera, virara iriha te vo haika vo haika ni nimi, nora autuvatama ni nimiainarave. Ho te taira tavaunara viravata vira okaravata ti tiva timiqe iriare, tiro.

⁷Viva minti tumanta vika qaiqaa virara tiha, Mpo, avuhainaao, are taira tavaanara vira tinavu tiva timiraqe viraqaahai tenavu vira okara ai tiva amiare, ti.

⁸⁻⁹Vika minti tuvaro Nebukanesaava oho tiro, Te ni okara irima kauro. Ne tiha, Kaiqe tenavu una uva vira tiva amiqi vuariraro vo entanavu aitarairaro taira tavaarirava vi vau vairaro viva qutu viraqe tenavu ho

variare, ti variarave. Oho, te taira tavaunara ne kia ti tiva timivera, te ni ekaama arukararave. Te taira tavaunara ne ho ti tiva timivera, te niara tiha, Vika vira okaravata ho ti tiva timikama vaivarave, tiro.

¹⁰ Avuhainaava minti tumanta vika tiha, Aqao, are taira tavaanara, virara kia ho tenavu ai tiva amirarave. Kia maa vataraqaa vai vaiintiva vovanovata virara ho ai tiva amianarove. Avuhainaa vaiinti haaru vauka nái nantimake nora vaiinti vaihavata, vika kia nái vure vaiintiarave, quaha vare vaukarave, opu makauqaa ampeqi vaukarave, vi uvara vi uvara tiva timiate ti vaurave.

¹¹ Mpo, avuhainaa, are tinavuara tenavu kia ho ai tiva amiaina uvara ti tiva timiate ti variaro. Kia vaiinti vovano ho ai tiva amianarove. Variqa vikaqaima vi uvara ho ai tiva amivarave. Ho vika niaraini vaiha kia vaiinti hampata maa vataraqaa variavo, ¹² tuvaro Nebukanesaara voqama kero arara itovaro viva uva varakero nai iqoka vaiintiara Babironiqi vo okara vo okara tave variaka ekaa aru taiqa kaate, tiro.

¹³ Minti tivakero uva vara komanta vira iqoka vaiintinavu oru vika arukareka ravaaqavuke ntiteha, Danieriravata vira navunaa vaiinti taaramonavuvata ravaaqavuke ntitora.

Kotiva Danierira taira vira okara umiqora

¹⁴ Iqoka vaiinti vikaqaa raqiki vauva Ariokiva avuhainaava tuntema kero, Babironiqi ekaa vo okara vo okara tave vau vaiintika ravaaqavukero ntite vauvaro, Danierira viva unaini oruntero kojemakero avu aato utukero vi vaiintira qihaaqama kero irero tiharo, ¹⁵ Nana kaarae avuhainaa vaiintivano tiharo vo vaiinti vo vaiinti arukaate tivo? tuvaro Ariokiva Danierira vi uvara vutukero tiva amura.

¹⁶ Minti tuvaro Danierira vaaka Nebukanesaava vaunaini oruntero tiharo, Mpo, avuhainaa, are voqavata qaqi vairaqe te inaaraiqa varike viraqaahai are taira tavaanara vira okara ai tiva amiare, tiro.

¹⁷ Minti tivakero Danierira anirantero nai naavuqi oruntero vi uvara nai navunaa vaiinti taaramonavu Hananiaara vo, Misaelira vo, Asaraiaara vo, tiva nimiro tiharo, ¹⁸ Nenavuvata Variqavano naaruvaini vaira aaraivaro viva tinavuara aaqurihama timiteharo avuhainaa vaiintivano taira tavaira tinavu qoqaa humiqairae te ho vira taira okara tiva amiariraro viva kia tinavuvata Babironi vaiinti vonavu hampata aru kaarie, tiro.

¹⁹ Danierira minti tivakero entaqi taira vo tavora. Kotiva Nebukanesaava taira tavora vira Danierira qoqaa umiqovaro tavora. Mintuvaro viraqaahairo Danierira Variqavano naaruvaini vaira vira autu tuahera keharo tiharo,

²⁰ Kaiqenavu Kotira autu ekaa enta ekaa enta tuaheraqi vuare.

Vivaqaima ekaa vo okara vo okarara iri vaivave.

Vira kempukavano uritarakero vairave.

²¹ Viva hove tivaro vi entavave quara entave qovara i vairave.

Viva avuhainaa vaiinti vo kempuka amiharo, avuhainaa vaiinti vo vira kempuka taiqake vairave.

Vivama koqe avu aato vataaka koqe avu aato nimi vairave.

Vivama koqe avu aato nimimanta vo okara vo okara kankomake iri tave variarave.

²² Anoma kero kukeqavi vai uvvara viva qovaramake vairave.

Konkiraqi kukeqatai haikara viva vira qaqi tave vairave. Viva vainaini voqamakero ataa i valvaro vairave.

²³ Kotio, are ti kaivaqaukavararaqaa raqiki variaravave.

Te ariara koqeve tivakehama ai autu tuahera ke vauro. Are koqe avu aato ti timihara, ti vaatavata kempukaiqama timitera iaro.

Tenavu ai aareha vo uva okara tinavu humiqaane turara are tinavu uva irira, vi uvvara okara tinavu humiqaaravera, te vi uvvara avuhainaa vaiinti ho tiva amirarave, tura.

Taira vira okara

²⁴ Vo kaiqa vo kaiqa tave vauka Babironini vauka arukaane tiro, avuhainaava vaiinti vo, Ariokira kaamatovaro Danieriva vi vaiintiva vaunaini oruntero tiharo, Kia vika arukaane. Are ti tivita varera vuru avuhainaa vaiintivano vainaini kaireqe te taira okara vira tiva amiare, tiro.

²⁵ Danieriva minti tuvaro vaakama Ariokiva vira vita varero King Nebukanesava vaunaini vuru kero virara tiharo, Iutaa vataihai rumpa vare aniaqaihai te vaiinti vo ranta kauro. Ho maa vi vaiintiva are avuhainaa vaiintivano taira tavaana okarara ai tiva amianarove, tiro.

²⁶ Minti tuvaro avuhainaa vaiintivano Danierira vira autu vo Beltesasaara irero tiharo, Are hoe te taira tavaunara viravata, vira okaravata ti tiva timinarave? tiro.

²⁷ Minti tuvaro Danieriva nai tiva amiro tiharo, Avuhainao, vure vaiintinavuve, quaha vaiintikave, hepi okara tave variakave, opu makauqaa ampeqi variakave, vikaqihairo kia vovano vi uvvara ai ho tiva amiarirava vaivo. ²⁸ Variqa vovano naaruvaini vaiva, vivaqaima kukeqavi vai uvvara qoqaiqamake vaivave. Avuhainao, viva are taira tavaanara viraqohairo naantiara qovaraiqaina haikara ai umiqairave. Ho are vaitehara taira vira tavaanara te vira ai tiva amirerave.

²⁹ Avuhainao, are vaitehara taira tavehara naantiara qovaraiqaina haikara tavaanarave. Kukeqavi vai uvvara vira okara qoqaiqamake vaiva, „Kotiva,“ naantiara qovaraiqaina haikara ai umiqairave.

³⁰ Viva vi uvvara qoqaiqama kero ti humiqairave. Kotiva mintiharo, kia tiriara vira avu aatovano ekaa vaiinti avu aatovata uri aatarakero

vaivama vaivo tiraitiro, viva ariara iriharo vi uvara okara kankoma kero iri tavaarire tiro, vira ti humiqairave.

³¹Avuhainaao, are taira tavaararo ai avuqaa vaiinti *maraqura/varaha* nora qoravano takuqiharo vaivarai aatu voqamakero itairave.

³²Vaiinti viva vaireva, vira qiata *kori* ori koqera viraqohairo aututero, vira mimiravata kauquvata *silvaa* oriqohairo aututero, vira auhaini *baraasi* oriqohairo aututero, ³³vira aiqutanta *aini* oriqohairo aututero, miani vira aiqutanta *ainiqohairovata* aaqatai vataqohairovata aututairave.

³⁴Are vi haikara tave variararo vate vira nora ori vovano, kia vaiintivano ventakai oriva naivano avataaviro onkaiqihairo tuviro miani vira aiqutanta *ainiqohairovata* aaqataiqohairovata aututairave ruqutukero rukavu raakavuma kairave.

³⁵Mintima kaivaro vaakama *ainivata*, aaqataivata, *baraasivata*, *silvaavata*, *korivata*, ekaa rukavu raakavuma vivaro konkomaiqama virave. Nora kuari itaivaro aaravau konkoma vaintema kero, vaiinti *maraqura/varaha* viva konkomaiqama vivaro, uvaivano utiharo konkoma vira vuqa kaivaro kia vaiinti *maraqura/varaha* viva voqavanovata qaqi vairave. Vi haikava ekaa taiqa vivaro vira ruqutukai orivaqai noruqamaqiro viviro, nora aiqina autuviro, ekaa vata maata mpiqakero vairave.

³⁶Are taira vira mintimakera tavaanarave. Ho are qaqi kairaqe te taira vira okaravata ai tiva amiare. ³⁷Avuhainaao, are ekaa hini avuhainaaukavata naatara kera nai avuhainaava noravano varianarave. Kotiva naaruvaini vaiva, viva ai noraiqama kero nora kempukavata, nora autuvata, ai amirave. ³⁸Ekaa vatainai variakave, ekaa aantauvahive uvirive, Kotiva vika ai kauquqi vataivara are vikaqaa raqiki varianarave. *Kori* qiatavano vaireva, arema vi qiatava variaro.

³⁹Are raqikiqira viraro ai naantiara vo vatanaa vaiintivano noraiqamaviro raqikiqiro vuanarove. Viva raqikiqiro viharo kiama ai voqaantema kero kempukaiqama kero raqikianarove. Viva raqikiqiro viramanta viraqaaahai vo vatanaaka naantiara qovarama vivaro vika avuhainaava, ekaa vo vata vo vataqaa raqikiqiro vuanarove. *Baraasiqohai* aututairave vira okara mintimama vaivo.

⁴⁰Ekaanaini vo vatanaaka qovarama vivaro vika avuhainaava raqikiqiro vuanarove. *Aini* kempuka vaintema kero, viva kempukaiqama kero raqikiqiro vuanarove. *Ainivano* vo haika vo haika rauhaantima kaintemake, vika ekaa vo vatanaa vo vatanaaka avuni vaika naatarakeha vika kempukavata taiqakevarave.

⁴¹Are tavaararo miani vira aiqutanta kakahivata *ainiqohairovata* aaqatai vataqohairovata aututairave. Vira okara vaireva, vi vatanaaka raqikiqi vivi, viraqaaahai rairavi hini kika kempukaiqamavivi vaimanta hini

kika kia kempukaiqamavi vaivarave. *Aini* aaqatai vataake autu taava kia kempuka vaintemake, vi vatanaaka raira vivaro vika kempuka hiniqai vairaro hini kia varianarove.

⁴² Vira aiqu kakahi *ainiqohairovata* aaqataiqohairovata aututaivaro vaintema kero, vi vatanaaka raqikiva hini kempuka vairaro hini kia kempuka varianarove.

⁴³ *Aini* orivata aaqataivata varakero aututaintemake, vi vatanaaka kia vohaa vatanaaka vairaiti, vika vo vatanaaa vo vatanaaka vaiha kia vohaa vairaiti, vika rairavi vaivarave. *Ainivata* aaqataivata kia vohaa vaintemake, vikavata kia vohaa vaivarave. ⁴⁴ Naantiara vi vatanaaka raquqi vivaro naaruvaini vai Variqava avuhainaa vaiinti vo qovarama kaanarove. Avuhainaa vaiinti viva raqikirava kia taiqa viramanta kia ho vo vatanaaka vira aatara kevarave. Viva ekaa vo vatanaaa vo vatanaaa vika avuhainaukavata naatara kero vika aru vehi autukero, viva ekaa enta ekaa enta raqikiqiro vuanarove.

⁴⁵ Are tavaararo nora orivano, kia vovano venta kaivaro naivano onkaiqihairo avataaviro tuviro miani vaiinti *maraqura/varaha* ruqutu kero, *ainive, baraasive, aaqataive, silvaave, korive*, ekaa vi haikara rukavu raakavuma kairave.

Variqavano uritarakero vaiva, viva naantiara qovaraiqaina haikara ai tairakaa umiqairave. Are taira tavaanara, te vira avuqavuqamake ai tiva ami, vira okaravata quqaama ai tiva amuro, tiro.

Avuhainaa vaiintivano Danierira koqaa amura

⁴⁶ Danieriva minti tuvaro King Nebukanesaava vataini hiqinti viro Danierira quahama amitero nai kaiqa vaiinti nititero tiharo, Danierira *ofaa* iha quara amite, koqe mura untavinara viravata quara amitaate, tiro.

⁴⁷ Minti tivakero viva Danierirara tiharo, Ai Variqavano ekaa vo variqavata aatara kaiva vahilo viva ekaa avuhainaa vaiinti vika Noravano vairave. Vivaqaima kia kankomake iri varia uvara qoqaa qovaramake vaivave. Te taira tavauna okarara are ti humiqaanarara ti, te ai Variqara minti turo, tiro.

⁴⁸ Minti tivakero viva Danierira koqe haika, vo haika vo haika amiro, vira noraiqama kero Babironi *provinsiqa* raqikiane tivakero virara tiharo, Te ai noraiqama kaarirara are ti koqe avu aato timi variaka vikaqaa raqikiharama variane, tiro.

⁴⁹ Minti tuvaro Danieriva nai navunaaka taaramonavu Sataraakirave, Mesaakirave, Abetnegorave, vinavukaravata iriharo avuhainaa vaiinti vira irovoro viva vinavukavata noraiqama komanta vinavuka Babironi *provinsiqi* vaiha vo kaiqa vo kaiqaqaa raqiki vauvaro, Danieriva naiqai avuhainaara naavuqi vahilo vira kaiqaqaa raqikiharo vaura.

Nebukanesaava vaiinti maraqura/varaha vo autukora

3 ¹Vo enta King Nebukanesaava vaiinti *maraqura/varaha* nora qora vo *kori* oriqohai autu timitaate tumanta vira autu amitora. Vi haikava vaireva, virini 27 *mita* vauvaro tauriniara 3 *mita* vaura.

Nebukanesaava tumanta vika vi haikara vare vuru Babironi *provinsi* Dura Uqitaini vaavi ara amitora.

²⁻³ Mini vaavi ara amitovaro avuhainaai vaiintivano *maraqura/varaha* vira quahama amitareva iharo ekaa nai *kamaanira* kaiqa vaiinti naarama tora. Nai maaqunavuve, noraiqukave, vika muntuvi vaukave, *kamaanira* monuqaa raqiki vaukave, *iasikave*, vika muntuvi vau *iasikave*, ekaa vo *provinsi* vo *provinsiqaa* raqikukave, vikavata vaiha vi haikara vaavi ara amitora quahama amitaate tiro, King Nebukanesaava ekaa vika naarama tomanta hihai hihai vika aninte, *maraqura/varaha* vira avuqaa ruvaaqumavi vaura.

⁴ Vika ruvaaqumavi vauvaro avuhainaara uva vaiinti nahenti tiva nimi vauva, viva naveraitiharo, Avuhainaai vaiintivano niara mintima iate tivo: Ne vo vatanaa vo vatanaaka, vo uva vo uva ti variaka, ⁵ ne vaiha iri vaimanta *aanumaara/noma* vuaqa kaimanta vokiakavata vo *musiki* vo *musiki* ruquti vaiha ihi hoqarama taimanta ne ekaa vataini kankakaavi vahama King Nebukanesaava *kori* vaiinti *maraqura/varaha* vaavi arataira, vira quahama amiteha vira autu tuahereha variate.

⁶ Vovano kia vataini kankakaaviro vira quahama amitero vira autu tuahera kairera, vi vaiintira vaakama ravaaqavuke nora iha itainaraqi aqu kaate, tiro.

⁷ Ho viva minti tumanta mini ruvaaqumavi vauka irumanta *musiki* hoqarama tomanta ekaa vo vatanaa vo vatanaaka, vo uva vo uva ti vauka, vika vataini kankakaavi vaiha King Nebukanesaava *koriqohairo* vaiinti *maraqura/varaha* vaavi aratora quahama amiteha vira autu tuaheraqi vi vaura.

Danierira navunaaka taaramonavuqaa uva vatora

⁸ Vi entara Babironi vatanaaka vonavu tiha, Kaiqe Iutaa vatanaakaqaa uva vataare, tivake vika orunte ⁹King Nebukanesaara tiha, Avuhainaao, are ekaa enta qaqi variqira vuane. ¹⁰ Are avuhainaava vahara vo uva vatera tihara, *musiki* hoqarama taimanta ne ekaa vataini kankakaavi vaiha *kori* vaiinti *maraqura/varaha* quahama amiteha vira autu tuahera kaate. ¹¹ Vovano kia kankakaa viro vira quahama amitairera, vi vaiintira ravaaqavuke nora iha itainaraqi aqu kaate, tianarave.

¹² Are minti tiaravata, Iutaa vatanaaka taaramonavu ai uva raqakaavo. Tota are Sataraakirave, Mesaakirave, Abetnegorave, noraiqama

kaaramanta vinavuka Babironi *provinsiqa* raqiki variarave. Vinavuka are avuhainaava tiva taana uvara raqake kia ai variqanavu nutu tuahera karaiti, vinavuka kia vataini kankakaavi vaiha are vaiinti *maraqura/varaha* vaavi arataanara quahama amitaavo,¹³ tuvaro avuhainaa vaiinti vira voqama kero arara itovaro tiharo, Vi vaiintinavuka ravaaqavu vare ti avuqaa vuru kaate, tiro.

¹⁴ Mintuvaro viva vinavukara tiharo, Sataraakio, Mesaakio, Abetnego, quqaae te vatauna uvara nenavu raqake kia ti variqanavu quahama nimiteha vika nutu tuahera karaiti, te *kori* vaiinti *maraqura/varaha* vaavi arataunara viravata ne kia vira avuqaa kankakaavi vaiha vira quahama amitaavo?

¹⁵ Oho, nenavu iri vase te tiare. Aanumaarave, vo *musiki* vo *musikive*, ruquтиha ihi hogarama taimanta nenavu vaakama vataini kankakaavi vaiha, vaiinti *maraqura/varaha* quahama amitehama vira autu tuahera kaate. Nenavu kia mintivera, te tiari vaakama ninavu ravaaqavu vare nora iha itainaraqi aqukevarave. Vika ni mintima kaivaro hoe variqavovano ninavu ruaruama nimitaanarove? tiro.

¹⁶ Miti tumanta Sataraakivavata Mesaakivavata Abetnegovavata nai tiva ami tiha, Avuhainao, kia tenavu tentanavu auta ntirerave.

¹⁷ Tinavu nora iha itainaraqi aqu kaivera, tenavu kaiqa vara amite vauna Variqava viva homa tinavu ruaruama timitaanarove. Avuhainao, viva ai kauquqihairo homa tinavu ruaruama timitaanarove.

¹⁸ Viva tinavu qaqlira kero kia ruaruama timitarera, maa uvara kankoma kera iri vairaqe tiare. Avuhainao, kia tenavu ai variqanavu kaiqa vara nimitaraiti, are *kori* vaiinti *maraqura/varaha* vaavi arataanara, viravata kia tenavu kankakaavi vaiha quahama amitaraiti, kia vira autu tuahera karerave, ti.

Vinavuka arukaate tura

¹⁹ Miti tuvaro Nebukanesaava vinavukara nai voqama kero arara itovaro vira virivano naare ntanta uvaro viva nai kaiqa vaiintinavu tiharo, Nora iha ite vairaqi qaiqaa qaiqaavata iha quarataivaro nai anomakero voqvavata itaarire, tiro.

²⁰ Miti tivakero viva nai iqoka vaiinti anomakero kempuka vaukara tiharo, Ne taaramo vinavuka rumpa vare muntu nora iha itairaqi aqukaate, tiro.

²¹ Miti tumanta viva tuntemake, vika Sataraakiravata Mesaakiravata Abetnegoravata rumpake kia vinavuka utavaaqave, vukai tavunave, tovaqave, qaqlira vara karaiti, vi haikara hampata nora iha itoraqi muntu aqukora.

²² Avuhainaa vaiintivano kempukaiqama kero iha noraiqaake quarataate turara tiro, ihavano nai noraiqama kero ite vaumanta iqoka

vaiinti vika taaramonavu muntu ihaqira aqukarare ti, vainto vuvaro, iha auruvano noraiqaa kero uriharo iqoka vaiinti vinavuka tatoqa aqukomanta ²³naaquntaqohai rumpatoka Sataraakivavata Mesaakivavata Abetnegovavata iha avutaqi aquvura.

²⁴Vinavuka iha avutaqi aquvuvaro Nebukanesaava vinavuka tavero vaaka himpiro nai kauqu runkinkiri iharo nai koqe avu aato ami vaukara tiharo, Quqaae tenavu taaramo vaiintinavu rumpa vare nora iha ite vairaqui aqu kauro? tumanta vika tiha, Avuhainao, quqaave, ti.

²⁵Minti tuvaro viva tiharo, Ike, tavaate. Erakaimante vaiintima iha avutaqi qaqi vi ani variavo. Taaramonavuqaa rumpataa naaquntava kia vaivaro ihavanovata vinavuka kiama tatoqake vaivo. Vaiinti vovata vaivaro vira virivano Variqa vaiinti viri voqaarama vaivo, tiro.

Taaramonavuara ihaqihai qaqini vaari ntaate tura

²⁶Nebukanesaava minti tivakero viva oru nora *sitopu* vira qentiana vaiharo naveraitiharo, Sataraakio, Mesaakio, Abetnego, nenavu nai kantaaqa virini vai Variqara kaiqa vaiintinavuma variavo. Viraqihai qaqini aitarate, tumanta vinavuka qaqini aitarora.

²⁷Mintumanta avuhainaa vaiinti maaqunavuve, *kamaanira* kaiqa vaiinti avuni vaukave, koqe avu aato ami vaukave, vika kia ihavano tatoqako vaiintinavuka tavareka ani ututumate vaura.

Vika tavovaro ihavano vinavuka qiata kaukivata kia aantauharama karaitiro, vinavuka utavaaqavata kia tatoqa komanta vika vinavuka uhiramake tavovaro kia vika vaataqahairo iha muntavata ura.

²⁸Mintuvaro Nebukanesaava tiharo, Kaiqenavu Sataraakira Misaakira Abetnegora vinavuka Variqa autu tuahera kaare. Vinavuka kempukaiqamake nái Variqara iriqi vuavaroma vinavuka Variqvano nai *enseli* vo atitaivaroma viva tuvuntero vinavuka ruaruama nimitaivo. Vinavuka te vatauna uvvara kia avataraiti tiha, Kia tenavu kankakaavi una variqa autu tuaherakaraiti, tenavu tentanavu Variqa autuqai tuaherakarerave, tivakeha kia nái qaqi variqi virara noraiqaake iriraiti, ne homa tinavu harukevarave tiarave, tiro.

²⁹Nebukanesaava minti tivakero tiharo, Ho te qaraaka uva vo vataari iriate. Ekaa naato vatanaakaqihai nai taukae vo vatanaakae, vo uva tiakae, vika Sataraakira, Misaakira, Abetnegora, vinavuka Variqara qora uva tivera, te tiari vika ravaaqavuke teqa taaqamake, vika naavu maaqavata rukuraakuramake vataate. Vi uvvara qaraaka uvama tivatauro. Vinavuka Variqa mpeqavano vaiharo vinavuka ruaruama nimitaintema kero, kia vo variqvano ho mintianarove, tiro.

³⁰Minti tivakero avuhainaa vaiinti viva Sataraakira Misaakira Abetnegora vinavuka noraiqama komanta vinavuka uri aatarake nora autu vare, Babironi *provinsi* qaiha *kamaanira* kaiqa varaqi vi vaura.

Nebukanesaava taira vovata tavora

4 ¹Ekaa vo vatanaa vo vatanaakave, ekaa vo uva vo uva ti variakave, vika vika igrate tiro, King Nebukanesaava maa uvvara varakero mintima tiro:

Te ni uva mantauro. ²Nai virini kantaaqaini vai Variqava nora kaiqa, vo kaiqa vo kaiqa ti humiqaimanta tavaunara, te vi uvvara ni tiva nimiari igrate.

³Ike, Kotiva vo kaiqa vo kaiqa tinavu humiqe vaimanta tenavu vi kaiqara nora kaiqa tavehamu kauqu runkinkiri i vauro. Vira kaiqavano vaireva, nora kaiqa mpeqa kaiqama vaivo. Viva ekaa enta ekaa enta raqikiqiro vuunarove.

Viva maa entara varia vaiinti nahentikaqaa raqikiqiro viviro, viraqaahairo viva ekaa naantiara naantiaraini qovaraiqi vaiinti nahentikaqaaavata raqikiqiro vuunarove.

⁴Te Nebukanesaaka te tenta avuhainaara naavuqi vauraro kia vo haikavanovata ti qoraiqama timitaimanta te koqemakeha variqi vunrarave. ⁵Mintiaqi vi, vo enta te vaiteha taira vo tavauraro ti voqamakero haatu itaimanta vaunarave. Te taira taveha ti voqamakero haatu itai haikara tavamaqi vunrarave.

⁶Te taira tave viraqaahai himpi, Babironiqi ti koqe avu aato timi variakara taira vira okara tiva timiate ti, te vika naarauramanta ⁷vure vaiintive, quaha vaiintive, opu makauqaa ampeqi variakave, hepi kaiqa vare variakave, vaana kaiqa vareha uva qovaramake variakave, vika vika ruvaaqumavi ti aaqanto variamanta te taira tavaunara vika tiva nimuramanta vika kia ho vira okara ti tiva timiarave.

⁸Ho ekaanaini Danieriva anintero ti aaqanto vaumanta te taira tavaunara viravata tiva amunarave. Te tenta variqa autu vora iriha, Danierirara *Beltesasaarave* tunarave. Te tavauraro tinavu variqanavu avu aatovano vi vaiintiraiqai vairave.

⁹Te Danierirara tiha, Beltesasao, are ti vure vaiinti vika qiata vaiintima variaro. Te kankomake iruraro kia tinavu qumina vaiinti voqaantemake varia variqauka, vinavuka aihovalo ai avutaqima vaivo. Te tavaurara are ekaa kukeqatai uva okarara ho qovaramakera ti variaravave. Te taira tavaunara ai tiva amiarirara are vira okara vutukera ti tiva timiane.

¹⁰Te taintaqaa vaiteha maa tairara tavaunarave: Te tavauraro ti avuni nora katari vovano vairave. ¹¹Vi katariva qampiqaqiro viviro ivaro, vira *amutuvano/turuvano* naaruvaini oruntaivaro ekaa vataini variaka vira ho taveva vairave.

¹²Vira marevano koqe mare vaivaro vira tavavata airi tava, ekaa vataini variaka ho hiqike neva vairave. Aantauvahivano vira okaraini

aumaqaara variamanta, vo uviri vo uvirivano vira kantakaaraqi naavu kaqateha variamanta, ekaa qaqi variqi vi varia haikauka, vika vika vira tava hiqikeha ne variarave.

¹³Te tenta taintaqaar vaiteha taira vira tavamaqi viha tavauraro naaruvaihairo *enseli* vo, maimaraara raqiki vaiva tuvuntero

¹⁴naveraitiharo,

Ne maa katarira tuquke vira kantakaara teqa taaqamake, vira mare rapahiqamake, vira tavavata hiqike raantaupirima kaate.

Vira okaraini aumaqaara varia aantauvahikave, uviri vika vira kantakaaraqi naavu kaqate variakave, ekaa vika ruhaaqi kaimanta vuate.

¹⁵Ne katari vira tuquke, vira tuqaqa *ainiqohaivata baraasiqohaivata* naavumate, tuqa vira qaqi kaivaro ukau hampata mini variarire.^a

Vi *vaiintira* qaqi kaivaro toqa varavuvano vira vaata putaiqama kaarire.

Vira qaqi kaivaro viva qaakau aantauvahi hampata niharo vika aanantero ukau namaqiro nuarire.

¹⁶Vira qaqi kaivaro viva 7 ihiara kia vaiinti avu aato vararaitiro, aantauvahi avu aato varaarie.

¹⁷Tenavu *enseli* maimaraara raqiki vaurauka vi uvvara tiva taatauke vataunarave.

Nai virini kantaaqaini vai Variqava, viva vaiharo avuhainauka vataini raqiki variakaqaa raqiki vaivave. Viva tarave nai amiataa i vaiintira, nora vaiintie, vehi vaiintie, kempuka vira amiraro viva noraiqama viro avuhainaava varianarove, tiarave.

¹⁸Ho te taira tavaurava mintimakero vaivo, tiro. King Nebukanesaava minti tivakero viva Danierirara tiharo, Beltesasao, ho vira okara ti tiva timiraqe iriare. Ti koqe avu aato timi variakaqihairo kia vovanovata vi uvvara ho ti tiva timivo. Kia tinavu qumina vaiinti voqaantemake varia variqauka, vinavuka aihovalo ai avutaqi vairara tira, are homa vi uvvara okara ti tiva timinarave, tiro.

Danieriva taira okara vira tiva amura

¹⁹Avuhainaava vaiinti viva nai taira tavora vira tiva amuvaro Danieriva, vira vo autu Beltesasaava, vi uvvara iriro vira okaravata kankoma kero irurara tiro, vira vaata qo itovaro viva uva tiarirava kia ho vaura.

Mintuvaro avuhainaava vaiinti viva virara tiharo, Beltesasao, are te taira tavauna okarara irihara kia qetaraitira, qaqi vira okara ti tiva timiane, tiro. Minti tuvaro Danieriva nai tiva amiro tiharo, Oho, avuhainaao,

^a 4:15 Katariara tiharo vaiintiara tuqantaakero ti vaura.

are taira tavaanara viravata, vira okaravata, kia ariqi vairaitiro, ai navutaakaqi variataarave.

²⁰Are katari tavaarava, vi katariva nora katari vaivaro vira *amutuvano/turuvano* naaruvaini oruntaivaro ekaa vatainai variaka vi katarira ho taveva vairave.

²¹Katari vira mare koqe mare vaivaro vira tavavata airitahaa vaivaro ekaa maa vataraqaa variaka vira ho neva vairave. Ekaa aantauvahi vira okaraini aumaqaara variamanta vo uviri vo uviri vira kantakaaraqaa naavu kaqateha variarave.

²²Avuhainaaao, arema vi katariva, nora katari mpeqa katarivano variaro. Ai kempukavano noraiqamaqiro viviro imanta ekaa maa vataraqaa varia vaiinti nahentika ai kempuka tavaarave. ²³Are tavaararo *enseli* vovano tuvuntero tiharo, Ne katari vira tuquke teqa taaqamake, vira tuqaqai qaqi ke, *ainivata baraasivata* varake vira tuqaqaa naavumate qaqi kaivaro ukauqi variarire. Ne vi vaiintira qaqi kaivaro toqa varavuvano vira vaata putaiqama kairaro vi vaiintiva qaakau aantauvahi hampata variqiro viharo 7 ihi vara kaarire, tirave.

²⁴Avuhainaaao, vi uvvara okara maantimama vaivo: Nai virini kantaaqaini vai Variqava are naantiara variqira vina okarara tairakaa ai umiqairave. ²⁵Vika vaiinti nahentiqihai ai ruhaaqi qaqini kaivara are qaakau aantauvahi hampata variqira vinarave. Are 7 ihiara variqira viharama purumakauvano ukau naintema kera, arevata ukau namaqira vihara, kia naavuqi vaitaraitira, ukauqiqai vaitaqira vi vairaro toqa varavuvano ai vaata putaiqama ke vairara variqira vinarave.

Are mintiaqira viraro 7 ihinavu aitarairaro ai avu aatovano kenko tirara viraqaahaira are Kotirara mintima tinarave: Ququaama nai virini kantaaqaini vai Variqava, viva ekaa vaiintivano raqiki variaraqaa raqiki vaivama vaivo. Viva nai nimiataa i vaiintika vi kaiqara nimi vairave, tinarave.

²⁶Enselivano qaqi kaivaro tuqavano vataqi variarire ti uvvara okara vaireva: Naantiara are Kotirara ququaama viva ekaa vataqaa raqiki vaivave tiraro viva qaiqaa ai noraiqama kairara are avuhainaa vaiinti vainerave.

²⁷Avuhainaaao, te koqe avu aato ai amiainara iriane. Qora aara qaqirakera koqe aaraqaa nuvaqira vihara vehi vaiinti nahentiara aaqurihamma nimitaane. Are mintiaqira virera, are koqema kerama variqira vinarave, tiro.

²⁸Danieriva tuntémakero vo enta King Nebukanesaava vauvaro ekaa vi haikava viraqaa qovaraiqura. ²⁹Vohaa ihi aitarovaro King Nebukanesaava Babironini nai avuhainara naavu qiata tanuqiraqaa niharo tiharo, ³⁰Tavaate, Babironi vatukavano nora vatukama vaivo. Vaiinti nahenti ti mpeqa okara taveha ti hutu tuherakaate ti, te tentavano maa vatukara autu kaunarave, tiro.

³¹Viva vi uvvara kia taiqa karaitiro, qaqi ti vauvaro naaruvaihairo uva vovano mintima tiro: King Nebukanesao, te tiarirara iriane. Vate maa entarama Kotiva are raqiki variana kaiqara qaquinima vara kaivo.

³²Vaiinti nahenti vikaqihai ai qaquinis ruhaaqi kaivara are qaakau aantauvahi hampata vahara purumakauvano ukau naintema kera arevata ukau namaqira viraro 7 ihinavu aitaraarire. Mintiraro ai avu aatovano kenko tirara are mintima tinarave: Ququaama nai virini kantaaqaini vai Variqava, vivama ekaa vaiintivano raqiki variaraqaa raqiki vaivama vaivo. Viva nai nimiataa i vaiintika vi kaiqara nimi vairave, tiro.

³³Uvavano naaruvaihairo minti tuntemakero, vaaka mintura. Vi entaraqaa Nebukanesaava „vueraiqaa vumanta“ vika vaiinti nahentiqihai vira ruhaaqi qaquinis kovaro viva purumakauvano ukau naintema kero, ukau namaqiro vi vaura. Viva ukauqi vauvaro toqa varavuvano vira vaata putaiqama ke vauvaro vira kauhivano memora kauhi voqaara qampiqovaro vira kakahivano uviri kakahi voqaara vukai vaura.

Nebukanesaava Kotira autu tuahera kora

³⁴„Nebukanesaava nai uva tivaqiro viharo tiharo, Te vueraiqamavi variqi vuraro 7 ihinavu aitaraimanta viraqaaahai te naaruva virini tave vauraro ti avu aatovano qaiqaa koqema vimanta vaunarave. Te nai virini kantaaqaini vai Variqara autuqai tuahera keha tiha,

Vivaqaima ekaa enta qaqi variqiro vi vaivave. Vivaqaima ekaa enta raqikiqiro vuanarove.

Vaiinti nahenti qovaramavi variqi vi vuru taiqa vivaro viva raqikiarira okarava kia taiqa viraitiro, qaqi variqiro vuanarove.

³⁵Viva tenavu vataini vaura vaiinti nahentika taveharo vika qumina haika voqaarama variavo ti vairave.

Ekaa naaruvaini variakave, ekaa vataini variakave, vika vira vevaaraini variavaro viva vikaqaa raqikiharo nai varaataa i kaiqara vare vairave.

Viva vo kaiqa varareva iraro kia vovano vira kauqu ho antuakaanarove. Kia vovano virara nantiharae mintiaro tiraro qaqira kaanarove, turo.

Te Nebukanesaaka minti tivake Kotira autu tuahera kaunarave.

³⁶Ti avu aatovano qaiqaa koqema vi entara vohaa vi entara „Kotiva, qaiqaa ti nora autuvata ti kempukavata timimanta te qaiqaa noraiqamavi avuhainauka vaiha raqikiqi vi vaunarave. Vohaa vi entaraqaa ti koqe avu aato timi varia vaiintikavata, nora vaiinti vonavuvata, ti rantake qaiqaa ti noraiqama kaamanta, te maa vataraqaa qaiqaa raqiki vaunarave. Ti kempukavano tota vaira viravata qaiqaa uri aatarakero vairave.

³⁷Vate te Nebukanesaaka naaruvaini Avuhainaava vaira, vira autuma tuaherake vauro. Vira mpeqa okaravano uritarakero vairave, Viva ekaa

kaiqa avuqavuqama kero naitarama kero vare vairave. Nái autuqai tuaherake vaika, viva vika nutu homa vatainiqama kaanarove, tiro.

„Nebukanesaava minti tura..„

Belisasaava nora kara nora

5 ¹ Nebukanesaava qutu vuvaro vira maaqu Belisasaava vira vatuka varora.. Vo enta entaqi King Belisasaava nai nora vaiinti 1,000navu naarama kero vika hampata nora kara namakero *uainivata* ne vaura.

² Vika *uaini* ne vauvaro Belisasaava nai kaiqa vaiinti vonavu nititero tiharo, Haaru ti qova, Nebukanesaava, Ieruharemini Kotira Naavuqihairo vare anu *kaapura*, *silvaaqohai* aututaarave, *koriqohai* aututaarave, ekaa vi *kaapura* oru vara viri timiqe tevata tenta nora vaiintinavuvata tenta naatanavu vatamake viraqi *uaini* qihiakeha naare, tiro.

³ Belisasaava minti tumanta vika oru vi *kaa p ura koriqohaiive*, *silvaaqohaiive*, aututo *kaa p ura* vare viri nimumanta avuhainaava vivavata, ekaa vo kukavata vi *kaapura* varake viraqi *uaini* qihiakeha ne vaura.

⁴ Vika *uaini* namaqi viha una variqa, vo variqa vo variqa autu tuaheraqi vi vaura. *Koriqohaiive*, *silvaaqohaiive*, *ainiqohaiive*, *baraasiqohaiive*, katariqohai, qaqi oriqohaiive, aututo haikara vika Kotira *kaapuqi uaini* qihiake neha vi haikara autu tuahere vaura.

⁵ Manti vauvaro vate vira, vaiinti vuqa vovano qovarama viro uva vo, hanta poruvaqaqaa qara ntuvaprovo vi vaura.

Avuhainaava vuqa vira tave vauvaro ⁶vira virivano vo qarama vauvaro viva voqama kero aatu itovaro aiqu kauqu ntiri ntiri i vauvaro vaura. „Vuqavano uva qara ntuvaprovo tauri kero viraqaahairo tuqaakuma viro kia vaura..„

⁷King Belisasaava naveraitiharo, Ti vure vaiintive, quaha vaiintive, hepi okara tave variakave, opu makau ampeqi variakave, ne ekaa vika naaraimanta vaaka aniate, tumanta vika Babironini vo kaiqa vo kaiqa tavoka naarama komanta anuvaro avuhainaava vikara tiharo, Niqihairo vovano maa uvara ho kaara ntuvaprovo tauri kero vira okaravata ti tiva timirera, te naare utavaqa vo vira ami, *kori senivata* vira auntaqi ruvu amite, vira noraiqama kaariraro vi vaiintiva vo vataqaa raqikiqiro viharoma *nampa* 3 avuhainaava vaiintivano varianarove, tiro.

⁸Manti tumanta vira vure vaiintinavu vo kaiqa vo kaiqa tavoka aninte, vi uvvara kaara ntuvake vira okara tiva amirare ti, tavovaro kia ho vaumanta vika qaqi vaura. ⁹Vira kaara King Belisasaara voqama kero aatu itovaro vira virivano qaiqaavata vo qara i vauvaro vaumanta, vira nora vaiintinavu viraqi vauka kia vi uvvara okarara ho tiva amiraiti, qaqi vaura.

¹⁰Mintuvaro avuhainaava vaiinti vira nova voqi vaharo uva *nontanta/otata* avuhainaava vaiinti vivavata vira nora vaiintinavuvata ti vaura

iriro, viva kara ne vau *rumura* viraqi oriqetero nai maaquara tiharo, Avuhainaao, are ekaa enta qaqi variqira vuane. Kia ai aatu itairaro ai virivano vo qara i vairara variane.

¹¹ Are raqiki variana vataraqaa vaiinti vovano vaivaro viraqi variqanavu aihovano vairave. Haaru ai qova vaharo tavaivaro vira avu aatovano variqanavu avu aato voqaara vairave. Ai qova King Nebukanesaava vi vaiintira noraiqama kaivaro viva vure vaiintive, quaha vaiintive, hepi okara tave variakave, opu makauqaa ampeqi variakave, vika qiata vaiinti vairave.

¹² Vi vaiintiva vo okara vo okara tave vaivave. Taira okarave, kukeqavi vai uvarave, kia kankomake iri varia uvarave, viva ekaa vi uvvara okara vutukero tiarirava vairave. Are vo vaiinti atitairaro oru vira vita varero maini aniarire. Vira autu Danierirave. Ai qova vo autu ntihararo Beltesasaarave turave. Vi vaiintiva homa maa uvvara okara ai tiva amianarove, tiro.

Danieriva vi uvvara okara tiva amura

¹³ Minti tumanta vaakama oru Danierira vita vare vuru avuhainaavaiinti avuqaa kovaro avuhainaava virara tiharo, Quqaae are Danierivave? Are ti qova ai maaqa Iutaihairo ravaaqavu varero viri kai vaiintivave? ¹⁴ Variqa vika aihovano ai avutaqi vaivara are vo okara vo okara kankomakera iriararo ai avu aatovano koqe avu aato vairave tiamanta irunarave.

¹⁵ Te tenta vure vaiintive, ti koqe avu aato timi variakave, naaramake maa uvvara kaara ntuvake vira okaravata ti tiva timiate turamanta vika kia ho mintiavo. ¹⁶ Ariara viva homa kukeqavi vai uvvara okara qovaramake vairave, vokiaka kia kankomake iria uvvara viva homa vutukero ti vairave, tiamanta irunarave. Are maa uvvara kaara ntuvakera, vira okaravata ho ti tiva timirera, te naare utavaaqa vo ai ami, *kori senivata* ai auntaqi ruvu amite, ai noraiqama kaarirara are *nampa* 3 avuhainaava vainarave, tiro.

¹⁷ King Belisasaava minti tuvaro Danieriva nai tiva amiro tiharo, Are ti timirera ina haikara nena qaqi tuatera, vi haikara vo vaiinti amiane. Te maa uvvara qaqi kaara ntuvake, vi uvvara okaravata ai tiva amirerave.

¹⁸ Avuhainaao, nai virini kantaaqaini vai Variqava, viva ai qora Nebukanesaara noraiqama kaivaro vira autuvata nora autu vaivaro viva nora vaiintivano vairave.

¹⁹ Kotiva vira noraiqama kaivarora tiro, viva avuhainaavaiinti noravano vaimanta vo vatanaa vo vatanaakave, vo uva vo uva ti variakave, vira aatu qeteha variarave. Ai qova avuhainaava vaharo vo vaiintinavu arukaataa ivaro vika aruke vairave. Viva vo vaiintinavu vehakuma nimitaataa ivaro viva vika vehakuma nimite vairave. Viva vo

vaiintinavu autu noraiqama kaataa ivaro vika autu noraiqamake vairave.
Viva vo vaiintinavu autu vataini kaataa ivaro vataini ke vairave.

²⁰Viva variqiro viro, viraqaahairo viva nai mahutaqai tiharo nai tivatai uvaraqaai avataqiro viharo, kia vo kiakaravata aaqurihamma nimite vaira kaara Kotiva vira kempuka taiqakero, vira autuvata vatainiqama kaivaro vovano vira vatuka varairave. ²¹Quara qaqini ruhaaqi kaantemake, vira vaiinti nahentiqihai ruhaaqi kaavaro vira avu aatovano aantauvahи avu aato voqaara vaivaro viva qaakau donki hampata variqiro viharo purumakauvano ukau naintema kero, vivavata ukau neharo kia naavuqi vaitaraitiro, ahakaqi vaite vaivaro toqa varavuvano vira vaata putaiqama kaivaro vaite vairave.

Ai qova mintiaqiro vivaro, viraqaahairo vira avu aatovano koqe uvaro viva tiharo, Quqaama nai virini kantaaqaini vai Variqava vaiharo ekaa vaiinti nahentiqaa raqikiharo vivaqai vo vaiinti voi vaiinti noraiqamake vaimanta vika vaiinti nahentiqaa raqiki variarave. Kotiva qaqi kai vaiintiva, vivaqai vaiinti nahentiqaa ho raqiqiro vi vairave, tirave. ²²Ai qova minti tivakero nai autu vatainiqama kaivara, are vira maaquvano virara irihara viva intema kera mintiataara vaivara kia are mintiraitira, nena autuqai tuahere variaro.

²³Oho, are Noravano naaruvaqaa raqiki vaira autu vatainiqama kera, nena autuqai tuaherake variaro. Are vira Naavuqihai vare ania *kaapura*, vo *kaapu* vo *kaapu* maa *rumuraqi* vara viri kera, Kotira qoraiqama amitehara are nena nora vaiinti vikavata, nena naata vika vatamake, *kaapu* viraqi *uaini* namaqi viha una variqa nutu tuaheraqi vuavo. *Koriqohaise, silvaaqohaise, baraasiqohaise, ainiqohaise, katariqohaise, qaqi oriqohaise,* aututaa haikava kia ho uva tiraitiro, kia ho uva iriraitiro, kia avu aato vatai haikava vaimanta ne una variqa vi haikara nutu tuaherake variavo.

Oh, Variqa vovano are qaqi variqira vinarave, are qutu vinarave, are koqema vinarave, are qoraiqama vinarave, ekaa vi haikava vira kauquqi vaivara, are kia vira autu tuahera karaitira, vira qoraiqama amite variaro. ²⁴Vira kaarama viva vuqa vo varakaivaro vuqa viva maa uvara poruvaqaa qara ntuva tairave.

²⁵Maa uvara qara ntuva taiva mintima tivo:

Mene Mene — Kaaranti Kaaranti
Tekel — Hirike
Parsin — Rairake

²⁶Vi uvara okara maantimakero vaivo:

Kaaranti: Kotiva are raqiqiqira vina entanavura kaara ntuvakero taiqa kairave.

Hirike: Kotiva *sikeriqaai* ai hirikero tavaivaro ai maaravano kia ho vairave.

²⁸ *Rairake*: Kotiva are raqiki variana vatara hini rairakero Midia vatanaaka nimo, hini Pesia vatanaaka nimirave, tiro.

²⁹ Qara ntuvato uvara vira okara Danieriva yutukero King Belisasaara tiva amuvaro viva vaaka nai kaiqa vaiinti tumanta vika naare tavuna vo varake Danierira nonku amite, vira auntaqi *kori senivata ruvu amitovaro* Belisasaava vira noraiqama kovaro viva *nampa* 3 avuhainaa vaiintivano vaura.

³⁰ Vi entara entaqi yokuka King Belisasaara arukovaro ³¹ viraqaahairo Midia vatanaaa vovano Dariusiva 62 ihi vara kova, vira vatuka varero, vi vataraqaa raqikiqiro vi vaura.

Danierira raioninavu vauraqi vara vaavi aqukora

6 ¹Dariusiva tiharo, Kaiqe te 120 vaiinti vonavu noraiqama kaari vika ti kahaqihia te raqikiaina vatara, vo vata vo vataqaa raqikiate, tiro.

² Minti tivakero viraqaahairo viva qaiqaa tiharo, Kaiqe te vaiinti taaramonavu kaama taari vinavuka 120 vikaqaa raqiki vaimanta vika kia muara vararaiti, avuqavuqama keha ti kaiqa vara timitaate, tivakero viva Danieriravata vaiinti votantavata kaama tora.

³ Ho Dariusiva tavovaro taaramo vinavukaqihairo Danierira kaiqavano uri aatarakero vauvaro, 120 vika kaiqvata uri aatarakero vaura. Minti varora tiro, avuhainaa vaiinti viva tiharo, Kaiqe Danierira qaiqaavata noraiqama kaariraro viva nora vaiinti vikaqata raqikiarire, tiro.

⁴ Minti tivakero viva mintiare tiro, auti vaumanta vo vaiinti vitantavata, 120 vaiinti vikavata toihia tiha, Danieriva tinavuqaa raqikiantorave. Kaiqenavu Danierira kaiqa ampeqamake taveha, vo uva rantake viraqaa uva vataare, tura.

Ho Danieriva kia hampi kaiqa vararaitiro, kia qutaru monu vararaitiro, kia popoheharo kaiqa vararaitiro, avuqavuqama keroqai kaiqa vare vaurara ti, vika kia viraqaa vate uvara vo ranta kora.

⁵ Viraqaa uva vateva kia vaumanta vika tiha, Viva qora kaiqa vare vairavauve, tenavu viraqaa uva ho vatararave. Ho Danieriva vo variqa autu tuaherake vaivave. Kaiqenavu virara iriha uva vo rantake viraqaa vataare, ti.

⁶ Minti tivake vika vohaa ruvaaqumavi avuhainaa vaiintivano vauraqi orunte virara tiha, King Dariusio, are ekaa enta qaqi variqira vuane.

⁷ Tenavu vo *provinsi* vo *provinsiqa* raqiki vauraukave, tenavu hininavu vika muntuvi vauraukave, tenavu hininavu *kamaanira* kaiqa vo kaiqa vo kaiqaqaa raqiki vauraukave, tenavu ekaa vohaa uva tivake vatauro.

Vi uvava maantimama vaivo: Are avuhainaa vaiintivano vahara uva vo vatera vaiinti nahenti vikara, Ne vohaa torara kia vo variqave vo vaiintive aaramaqi viraiti, tiqai haaramaqi vivaro vi torava taiqaarie. Ne vohaa tora viraqi vaiha vo variqave vo vaiintive arerer te qioqama

tauro, tiane. Vovano are qioqama tena uvara raqa kairera, vira kaara are tiramanta vi vaiintira ravaaqavu vare muntu *raioni* varia *ruvuraqi/ mpumpiraqi* vira aqu kaate.

⁸ Avuhainaao, Midia vatanaaka Pesia vatanaaka uva vate okarara iriharama are vi uvara vatera, nena autuvata vi uvaraqaata vatairaro vi uvava kempukaiqama viraro vovano vi uvara nunka kero vo uva vataarirava kia ho variarire, ti. ⁹Vika minti tuvaro King Dariusiva eo tivakero vi uvara vatero nai autuvata vi uvaraqaata qara ntuvatora.

¹⁰ Avuhainaava qaraaka uva vatora virara Danieriva iriro viva nai naavuni oruntero vura. Naavu maarini *uintua* vovano Ieruharemi mantaraini vauvaro Danieriva oru *uintua* vaura mini qoqaa vaharo vo enta vo enta taaramo tataa tori kauru araviro Kotira aaron tema kero, viva qaiqaavata vira aare vaura. ¹¹Viva Kotira aare vaumanta vi vaiintika orunte vira tavora.

¹² Vika tave, viraqaahai kante oru avuhainaava vaiintiara tiha, Quqaae are vo uva vatera nena autuvata vi uvaraqaata qara ntuvu taanararave? Are tihara, Ne ekkaa vohaa torara kia vo variqave vo vaiintive aaramaqi viraiti, tiqai haaramaqi vivaro tora taiqaarire. Ne vohaa tora viraqi vaiha ne vo variqave vo vaiintive aarerava qioqama tauro. Vovano ti uva raqa kairera, te tiari vika vira ravaaqavuke vare *raioninavu* variaraqi muntu aqkevarave, tianararave, ti.

Vika minti tuvaro avuhainaava vaiinti viva tiharo, Eo, te vi uvara quqaa vataunararave. Midia vatanaaka Pesia vatanaaka uva vataa okarara irihama te vi uvara vataunararave. Kia vovano vi uvara nunka kero vo uva vataarirava varianarrove. Tevata kia ho vi uvara nunkake vo uva vataarirava varianarrove, tiro.

¹³ Minti tumanta vika avuhainaava vaiintiara tiha, Iutaa vataihai ravaaqavu vare ania vaiintiva Danieriva, viva kia ariara noraiqaakero irivo. Viva are uva vatera nena autu qara ntuvu taanara viraravata kia noraiqaakero irivo. Viva vo enta vo enta taaramo tataa nai variqa aaramaqiro vi vairave, ti.

¹⁴ Minti tuvaro avuhainaava vaiinti vira muntukavano qoraiquvaro viva Danierira kahaqiaina aarara rantakare tiro, qumina rantaqiro vuvaro kuarivano ruhunku vura.

¹⁵ Kuari aqu vumanta vika avuhainaava vaiintivano vaunaini orunte tiha, Avuhainaao, are iritaane. Midia vatanaaka Pesia vatanaaka uva vataa okarava maantima vairave: Avuhainaava vaiintivano vataina uvara, naie vo vaiintie kia ho vi uvara qaqini vara kevarave. Ekaarama vi uvava varianarrove, ti.

¹⁶ Vika minti tuvaro viva Danierira kahaqiaina aarara ranteha tavovaro kia vauvaro avuhainaava vaiinti viva tumanta vonavu oru Danierira ravaaqavu vare muntu *raioni* vauraqi aqukora. Viraqi aqu kovaro

avuhainaa vaiinti viva Danierirara tiharo, Mpo, are kaiqa vara amite variana Variqava, viva ai kahaqama amitaarire, tiro.

¹⁷Minti tumanta vika ori nora varake *ruvu/mpumpi* nona tinta tovaro vovano evaara anintero ori qaqlini varakero Danierira ruaruama amitaantorave tiro, avuhainaa vaiintivano vuka vatareva *iva/qume* viraqaa nai *ringiqohairo ntavakero* taatau tomanta, nora vaiinti vikavata nái *ringiqohai* mintura.

¹⁸Ho avuhainaa vaiinti viva orurantero ani nai avuhainaara naavuqi vaharo kia vaitaraitiro, kia kara naraitiro, kia nai *musiki* ruquti vauka naararaitiro, qaqi variqiro viro aatita kora. ¹⁹Mintiaqiro viro aatita kero viva himpiro kantero *raioni* vika vaunaini oruntora.

²⁰Mini oruntovaro vira muntuka qoraiquvaro auntu raqaivarо Danierira aarerо tiharo, Mpo, Danierio, are qaqi variqiro vi vai Variqara kaiqa vara amite variarava variaro. Are enena kaiqa vara amite variara Variqava, viva ai ruaruamae, amitaivo kiae ruaruama amitaivo? tiro.

²¹Minti tuvaro Danieriva nai tiva amiro tiharo, Avuhainaao, are ekaa enta qaqi variqira vuane. ²²Ti Variqavano *enseli* vo atitaivarо viva tuvuntero *raioni* vika ti qoraiqama timitevorave tiro, vika no tinta kaivo. Ti Variqavano tavaimanta te vira avuqaa vaiha kia qora kaiqa vare vaunarave. Te kia aivata qora kaiqa vara amitaunarave. Virara iriharoma viva ti ruaruama timitaivo, tiro.

²³Danieriva minti tuvaro avuhainaa vaiinti vira muntukaqihairo quahara haikavano qovaraiquvaro viva vaiinti vonavuara Danierira ori *ruvuqihai/mpumpiqihai* raraу vaari qaqlini kaate tumanta vika viraqihai raraу vaari qaqlini ke tavovaro kia vira vaata teqa taaqama kovaro vira vaatavano qaqi koqema kero vaura. Danieriva nai Variqara ti ruaruama timitaanarove turara tiro, Kotiva vira ruaruama amitora.

²⁴Mintuvaro avuhainaa vaiinti viva vo vaiintinavu nititama kero tiharo, Danieriraqaa uva vate vaiintika, ne vikavata vika naata vaintivata ravaaqavu vare, muntu *raioni* vairaqui aqukaate, tumanta viva tuntemake, ekaa vika ravaaqavuke muntu *raioni* vauraqui aqukora.

Aqukomanta vika kia vataqaa hiqintiraiti, qaqi kantaqaqaini tuvi vaumanta *raioni* vaaka vutunte vika ravaaqavuke vuhaarivata kutu kautumake nama taiqa kora.

²⁵Viraqahairo avuhainaa vaiinti viva nai raqiku vaiinti nahentika vo vataini vo vataini vaukave, vo uva vo uva ti vaukave, vika vikaini qara varakero tiharo,

Te ni uva mantama nimitauro.

²⁶Te niqaa raqiki vauraqua uva vo ni tiva nimiari ne vi uvara avataqi vuate. Ne vo vataini vo vataini vaiha Danierira Variqa aatu geteha, virara noraiqaake iriqi vuate, turo.

Viva qaqi variqiro vi vai Variqavave. Viva ekaa enta qaqi variqiro vuuanarove.

Viva raqikiqiro vinara kia vovano vira vehiqamakero taiqa kaanarove.

²⁷Viva vaiinti nahenti kahaqama nimiteharo ruaruama nimite vaivama vaivo.

Tinavuara nai okara kankomake tavaate tiro, viva nora kaiqa naaruvainivata maa vataraqaaavata vare vairave.

Viva *raioni* noqihairo Danierira ruaruama amitairave, tura. King Dariusiva minti tura.

²⁸Ho vi entaraqaahairo Danieriva Dariusiva raqiki vau entaravata, Pesia vatanaa vaiinti Sairusiva raqiki vau entaravata, koqema kero variqiro vi vaura.